

弇州山人續稿卷之八十九

吳郡王世貞元美著

文部

史傳

馬文升字負圖河南鈞州人勤力有異兆貌瓌奇多
膂力嘗與群兒戲角之靡不仆者七歲讀書知大義
踰冠舉鄉試二十六登進士吏部尚書王直異其材
選授監察御史勤力自課所論建靡不依傳大體時
領臺事者王文王翱皆嚴重鮮可而獨寄腹文升以
爲國器出按山西再按湖廣所至發奸摘伏有神君

稱墨吏相率望風解印綬去還領全臺章奏以毋憂
歸服除超拜福建按察使鎮守中貴人虐而肆獨文
升能制之小斂戢人爲諺語以美焉進南京大理寺
卿丁父憂歸成化之初固原土夷滿四與其黨劫其
從子指揮璫據石城以叛陝西巡撫與中貴人將討
之大敗事聞合寧夏延綏兵討之復大敗 詔逮巡
撫諸臣俱下獄而即家超文升爲都察院右副都御
史代之巡撫俾佐總督都御史項忠率京邊諸軍五
萬人往討文升馳急傳十日而至陝時兵已發則簡
練其留後者申約束通轉餉五日而嚴馳至軍偕項

忠屯中路賊來敵與戰殺傷相當居數日復戰少利而伏羗伯毛忠意輕敵先登賊徼其歸路戰死衆懼欲退而文升乃率麾下爲後繼且令斬先退者衆始得不敗文升復言於項忠盡焚城傍草及斷汲路賊始稍稍困詐請降項忠與總兵劉玉以輕騎往未得要領而文升復繼之滿璫乃乘間出降而滿四等復鼓噪堅守會得降人楊虎力故與滿四腹心使爲間而誘之出伏兵執之石城尋潰先後俘斬首虜七千六百有奇獲其男女老弱二千六百文升請於項忠釋使歸里而命右布政余子俊平夷其險歛戰骨悉

瘞之以少牢祭其人悅捷聞進文升左副都御史仍
賜金帛漢中流民李胡子倡妖言挾其衆以叛潼關
軍餘火蝎兒蒲城民王彪負山鑄山因肆爲刼掠文
升悉捕滅之滅西固番族之不即命者三十餘曹虜
牧河套將窺伺我文升多築城堡募土民數千授之
兵使相聚保虜乃徙去臨洮鞏昌饑延綏旱文升前
後設法轉芻粟給之所全活以萬計時茶法已久弛
文升飭之以易番馬八千餘匹軍中騎皆給遂疏言
時事十五條及禦戎三策 上皆嘉納進提督甘涼
寧夏三鎮軍務虜寇臨鞏文升遣兵逐之至黑水口

破擒其平章迭列孫虜復寇韋州深入至好水川文
升復縱兵破之於湯羊嶺斬首積級至二百餘獲其
馬牛羊輜重不可勝計名其嶺曰得勝坡勒石紀之
遂進兵平岷州叛番獲其酋首文升有所奏捷不爲
夸張中亦無主之者以是報賞薄久之始入爲兵部
右侍郎三品滿九載僅予二品祿奉出飭薊門以東
至遼左邊備文升嚴汰其弱弗堪者而製五花營入
陣圖教之使習皆爲精兵還進左侍郎時陳鉞等後
文升而爲巡撫多訶伺將吏小罪輒逮逮輒罰馬而
釋之將吏旣怨且狎法而馬價亦踊貴文升上邊事

十五條因及之。鉞以是銜文升。時海西衛都指揮散赤哈移文訐驗。夷管指揮受其真珠豹皮官為究管。指揮懼賂其都督。產察使繫管散赤哈恨之。乃率所部十餘騎稱入貢。欲以面聞鉞。而守將以非所入貢道却弗納。散赤哈益恨。而過經女直建州三衛。亦以朝廷昔誅董山詆不平。因留散赤哈聚兵得數千騎。大掠鳳集諸堡。鉞集兵拒之。則已去矣。獨近塞者僧格等十八族皆已有使貢。恐誤中兵而留其使走之。撫順所白其狀。鉞方欲自解。與副帥韓斌謀置之獄。而夜掩屠其族殆盡。更奏揭巢捷。且請大兵議勦撫。

太監汪直方銳功名欲自往爲言於上遣太監懷恩覃昌等詣內閣召六部議萬安等相顧莫發而兵部尚書余子俊言虜使入貢而掩屠其家何以爲中國恩曰然則撫之乎撫之以一大臣偕大通事往可也其意欲以沮汪直而文升疾應曰善懷恩入白之上即傳旨命文升偕大通事詹昇往而直聞亦有所憾於文升矣文升至乃盡赦其被屠家餘衆數百人撫以好語且給之布粟而海西與三衛亦來聽撫文升察其意不盡實乃具言其狀而行諸路伏兵以待俄復入寇伏兵發斬首二百餘級生擒數十人鹵駝

馬稱是因兵威以諭都督產察懼悉請歸命而汪直意不能已欲自出以爲功至遼左而事定矣文升與議戒勿用兵直亦陽聽納然銜其敵禮且無所饋而陳鉞則飭厨傳盛爲供張見直叩頭便辟左右僚從皆有賄相與謀而傾文升矣文升竣事歸賜綵幣羊酒理部事而直則已密疏言文升實激之變於是復偕刑部尚書林聰等往勘如直言而文升得戍四川之重慶衛天下聞而寃之汪直旣傾文升則偕陳鉞大發兵破諸屬夷鉞拜賞賜傾府庫未久皆敗而文升復起以左副都御史撫遼東士卒皆鼓舞而當陳

鉞厚者不能無自疑文升坦懷待之而日孜孜理軍政且禁戢中貴人洪義總兵緱縑之爲股人益稱之亡何進右都御史總督漕運兼巡撫鳳陽等處文升至而其地旱文升策之歲且侵乃預江南糧二十萬石舟費十萬兩免一切採辦以待之歲果侵文升出以賑貸且平糶藉而毋流莠召拜兵部尚書文升念天下方困用兵思所以休息之而貴州都勻之叛苗不即命守臣請合三鎮兵追討文升議不可惟遣官勘處而已卒無他時上幸方士李孜省欲有所薦引代文升而間之中旨調南京兵部尚書叅贊機

務留政爲一新 孝宗皇帝立召改都察院左都御史入見於文華殿賜綵織緋衣一襲從幸太學坐聽講於彛倫堂侍經筵賜白金文幣寶鈔、上躬耕籍田與行九推禮既宴而教坊以雜伎陳且出褻語文升正色曰汝曹第陳農家作苦使新 天子知稼穡艱而褻語何爲咸逡巡却避公卿愧之時太監陳喜以方士鄧常恩言誘 先帝於嶽鎮海瀆俱立碑爲隱語下寘寶物厭鎮文升請悉仆碑發函入寶物于官從之乃復條上十五事如簡風憲重刑獄禁擴拾嚴考覈申命令廣儲畜驅術士清僧道節財用皆

鑿鑿中窾

上皆爲嘉納時

上山陵未畢而中官

郭鏞請益選二妃以廣儲嗣文升獨持不可而少詹

事謝遷亦言之乃寢四川山西浙江建昌災異漕作

文升上書言之語甚危且請行賑施蠲採辦銀課與

額外徵稅特命文升提督十二團營兵馬掌院事如

故二品滿初考時子總以鄉貢士待選文升使請外

曰必大臣子而京秩誰當外者尋復爲兵部尚書京

師大水上疏陳時事十餘條於貴幸多所侵而嚴覈

六軍諸校斥其貪黷選愼者三十餘人以是有怨家

夜持弓矢警文升門又飛書證其過射入東長安門

內事聞

上嚴令錦衣官校緝訪而給金吾騎士十

二出入爲文升衛文升因乞休優詔不許屬文升有
小疾而虜小王子以數萬騎駐大同邊外勢洶洶

上使中貴人挾醫視文升疾賜上尊脯餼因問計文
升謂此虜方敗於他部勢已絀無能爲也請密爲之
備而揚聲逼之虜果徙去安南侵奪占城之五州地
詔勒還之數支吾不服文升言萬里喻度固難且不
足墜九重顧而會二國各入貢貢使至乃請面折諸
廷安南詞服因諭以恩威利害且厚賜之歸而果還
侵地廣西土守岑欽與姪溥相讐殺巡撫欲因以爲

功請討之文升不許第令騰書戒飭已皆悔悟納款
請死時南畿浙江大水河南山東陝西山西旱文升
請亟勅撫臣發庾以賑遣使崇祀群神爲民祈請馬
政弊甚苦孳生寄養者復請覆覈減定其額著爲令
上以文升在任久特加太子少保久之又加太子太
保皇太子出閣講學再進少保太子太傅階光祿大
夫勲柱國而文升上章請擇正人輔導以端聖功得
諭德王鏊等十餘人有旨傳陞畫工張玘等二十七
員爲錦衣千戶文升力諍謂此 无朝弊孔賴 上
初窒之今復啓之耶且無功而冒武職使邊將解體

而江南歲侵有司請募民入粟授以指揮等官文升
復諍以爲授以散官可也授之指揮亦能使邊將解
體上皆爲停弗行貴州苗叛文升奏遣鎮遠侯顧溥
討之克其寨數十斬馘數千級苗遂平西虜數入寇
甘涼文升請使游擊將軍魯麟擊之而調延綏洮河
兵爲後繼斬其剽掠者百五十騎虜乃退哈密忠順
王者故元遺孽也文皇帝寵其王予金印使率其
民城哈密居之以通西域貢道其位高而兵最弱忠
順王死王母當國爲吐魯番酋鎖檀阿力所擒鹵人
畜併奪其金印以去鎖檀阿力死子阿黑麻立以金

印歸我文升請以王母之甥陝巴爲忠順王填之阿
黑麻怨明賞薄陝巴賤種也何得王哈密復輕兵入
哈密虜陝巴及金印以去而使其驍將牙木蘭以三
百騎守之文升奏請執阿黑麻之貢使寫亦滿速兒
等四十餘人流聞廣而薦都御史許進撫甘肅使率
副將彭清等選番漢兵倍道而至夜坎城登破之斬
級六十降自保者八百人牙木蘭以千里馬走謁阿
黑麻而阿黑麻方與赤斤蒙古衛相讐攻不能大發
兵使別將將輕騎五百圖復哈密復爲赤斤衛兵所
徼殺殆盡乃遣使上書謝罪請歸陝巴及金印於是

文升亦奏還其貢使酬以少金帛而哈密復矣皇清

寧宮災

太皇太后皇太后同居仁壽宮

上命

文升與工部臣議修建文升上言團營軍餉於役甚
矣不可復相苦楚蜀災亦不勝採伐而三廠有儲木
尚可材太僕馬惜薪薪其價可以資工匠木石費也
不足則幸發內帑數萬金以繼之報可蓋落成而公
私不告匱 皇太后徙居之懽甚予文升一子錦衣
百戶賜錦幣亦優等而北虜火節大入邊殺掠吏民
上憂之甚召對便殿賜酒饌給筆札詢以戰守之策
文升乃薦保國公朱暉等十餘人使選練營卒待報